



Anwar menandatangani buku 'Rethinking Ourselves: Justice, Reform, and Ignorance in Postnormal Times'.
(Foto FB Anwar Ibrahim)

Anwar zahir inspirasi dalam karya terbaharu

Kuala Lumpur: Dalam kesibukan menjelang pembentangan Belanjawan 2026 petang semalam, Datuk Seri Anwar Ibrahim, sempat meluangkan masa menandatangani buku terbaharunya, *Rethinking Ourselves: Justice, Reform, and Ignorance in Postnormal Times*.

Perdana Menteri berkata, buku berkenaan yang meneroka mengenai perubahan yang dialami dunia, yang membawa kesan kepada kehidupan akan dilancarkan secara rasmi tidak lama lagi.

“Semoga karya ini menjadi inspirasi untuk kita merenung secara mendalam mengenai dunia yang kita diami, serta perubahan bermakna yang perlu kita zahirkan demi membina masa depan lebih adil, manusiawi dan beretika,” katanya menerusi perkongsian di Facebook, semalam.

Berdasarkan sinopsis, *Rethinking Ourselves: Justice, Reform, and Ignorance in Postnormal Times* berkisar mengenai penerokaan yang mengubah paradigma mengenai keadilan, demokrasi dan Islamofobia, yang mengajak masyarakat menilai semula tanggapan serta membina masa depan lebih saksama.

Menerusi buku itu, Anwar mengajak masyarakat memikirkan semula diri dalam mendepani zaman yang menggelirukan, tidak menentu dan bergolak serta membentuk masa depan lebih adil dan lestari.

Semangat beliau berpaksikan kepada pengalaman hidup, yang menghabiskan masa lebih sedekad di penjara, bermula dari zaman beliau sebagai aktivis pelajar hingga kepada peranannya sebagai Ketua Pembangkang.